

दिनांक 15.05.2025

समय: 18.45 बजे

- उपराष्ट्रपति जगदीप धनखड़ आतंकवाद ने दुनिया सारु चिंता रो मुद्दो बतायो-जयपुर मांय भैरों सिंह शेखावत स्मारक पुस्तकालय रो उद्घाटन कीनो।
- रक्षामंत्री राजनाथ सिंह कह्यो-पाकिस्तान सागे आवता बगत मांय बातचीत केवल आतंकवाद अर पाकिस्तान रा कब्जा वाळा जम्मू-कश्मीर रा मुद्दा माथे ही व्हेला।
- ऑपरेशन सिंदूर री कामयाबी रो जश्न मनावण सारु प्रदेशभर मांय न्यारा-न्यारा कार्यक्रम-जयपुर मांय तिरंगा यात्रा निकाळी ज्यी।
- खेलो इंडिया यूथ गेम्स आज पूरा व्हे रह्या है-राजस्थान तीजी ठौड़ माथे रह्यो।
- प्रदेश मांय गर्मी रो असर आज ओजू बध्यो-आतूणी हलकां मांय आवता दिनां लू बाजण री शंका।

0000

उपराष्ट्रपति जगदीप धनखड़ कह्यो है के आतंकवाद दुनिया सारु चिंता रो मुद्दो है। वे कह्यो के भारत रा हिफाजती दस्ता आतंकवाद रो मुंहतोड़ जवाब दीनो। श्री धनखड़ आज पैली वाळा उपराष्ट्रपति भैरोंसिंह शेखावत री पुण्यतिथि रे मौके जयपुर मांय राख्यी ज्या कार्यक्रम मांय बोल रह्या हा। वे देश री हिफाजत करण वाळा फौजियां रो धन्यवाद कीनो। श्री धनखड़ कह्यो के भारत री फौज विश्व स्तर माथे नुवा मानदंड स्थापित कीना है।

कार्यक्रम मांय उपराष्ट्रपति कह्यो के भारत वां री ताकत बतावण सारु जद पोकरण मांय दूजी दफा परमाणु परीक्षण कीनो, वां बगत भैरों सिंह शेखावत राजस्थान रा मुख्यमंत्री हा। श्री धनखड़ कह्यो के देश रा विकास मांय बाबोसा रो योगदान हमेशा याद राख्यो जावेला। उपराष्ट्रपति भैरों सिंह शेखावत स्मारक पुस्तकालय रो उद्घाटन ई कीनो। कार्यक्रम मांय राज्यपाल हरिभाऊ बागडे, केन्द्रीय मंत्री गजेंद्र सिंह शेखावत अर उपमुख्यमंत्री डॉ. प्रेमचंद बैरवा समेत केई मान्योड़ा लोग मौजूद रह्या। इण ऊं पैली आज संवारे मुख्यमंत्री भजनलाल शर्मा जयपुर रा विद्याधर नगर मांय भैरोंसिंह शेखावत री समाधि माथे सिरधा रा फूल चढ़ाया। वे बाबोसा ने याद करता थकां कह्यो के सियात मांय कर्तव्यनिष्ठा, नैतिकता अर जनसेवा रा आदर्श प्रतिमान शेखावत री देश रा भला अर जनता रा कल्याण सारु समर्पित जिन्दगी सगळां ने सीख देवे है।

000

रक्षामंत्री राजनाथ सिंह कह्यो है के आतंकवाद अर बातचीत एके सागे नी चाल सके है। वे आज जम्मू-कश्मीर रा श्रीनगर मांय फौज री 15 कोर बादामी बाग छावनी मांय फौजियां सामी बोल रह्या हा। श्री सिंह कह्यो के आवता बगत मांय पाकिस्तान सागे बातचीत केवल आतंकवाद अर पाकिस्तान रा कब्जा वाळा जम्मू-कश्मीर रा मुद्दा माथे व्हेला। रक्षा मंत्री ऑपरेशन सिंदूर री कामयाबी सारु फौज री हिम्मत री सराहवणा करता थकां कह्यो के देश ने वां रा संकल्प अर समर्पण माथे नाज है। श्री सिंह कह्यो के ऑपरेशन सिंदूर लारला केई बरसां ऊं पाकिस्तान अर वां रा कब्जा वाळा जम्मू-कश्मीर मांय पसार्या जा रह्या आतंक रे खिलाफ भारत री करड़ी कार्रवाई है।

000

ऑपरेशन सिंदूर री कामयाबी रो जश्न मनावण सारु प्रदेश मांय न्यारा-न्यारा कार्यक्रम राख्या जा रह्या है। भारतीय जनता पार्टी री ओर ऊं तिरंगा यात्रा निकाळी जा रही है। आज जयपुर मांय तिरंगा यात्रा निकाळी ज्यी। मुख्यमंत्री भजन लाल शर्मा यात्रा री अगुवाई कीनी। ऐतिहासिक अल्बर्ट हॉल ऊं सरु व्ही आ यात्रा बड़ी चौपड़ जा र पूरी व्ही। रैली मांय शामिल लोग हाथां मांय तिरंगा झंडा ले र देशभक्ति रा नारा लगाया। यात्रा सरु व्हेवण ऊं पैली जनता ने संबोधित करता थकां मुख्यमंत्री भजन लाल शर्मा कह्यो के ऑपरेशन सिंदूर रे दौरान सशस्त्र बल अद्भुत हिम्मत अर

वीरता रो दरसाव कीनो। मुख्यमंत्री कह्यो के फौजियां रा मान मांय तिरंगा यात्रा निकाळी जा रही है।

भाजपा रा प्रदेश अध्यक्ष मदन राठौड़ कह्यो के तिरंगा यात्रा राज्य रा सगळा विधानसभा हलकां मांय अर ब्लॉक लेवल माथे निकाळी जावेला। वे कह्यो के फौज रा जवान पाकिस्तान ने करड़ो जवाब दीनो।

यात्रा मांय भारतीय जनता पार्टी रा केई नेता, राज्य मंत्रिपरिषद रा सदस्य, धर्मगुरु, रिटायर व्ह्या फौजी, एन.सी.सी. कैडेट अर सामाजिक अर कारोबारी संगठनां रा सदस्य शामिल व्ह्या। ई सिलसिला मांय प्रदेश रा केई रेलवे टेशनां ने तिरंगी रोशनी ऊं सजायी ज्या है। ई सागे ई रेलवे रा न्यारा-न्यारा दफतरां माथे ई रोशनी ऊं सोहवणी सजावट करी ज्यी है। फौज री वीर गाथा री जाणकारी देवण सारू टेशनां माथे देशभक्ति रा गीत बजाया जा रह्या है। ऑपरेशन सिंदूर री कामयाबी ऊं जनता मांय ई उमाव है। झालावाड़ मांय न्यारा-न्यारा तबकां रा लोग फौज री सराहवणा कीनी।

000

राज्यपाल हरिभाऊ बागडे कह्यो है के नुवी शिक्षा नीति नैतिक मूल्यां ने आगे बधावण वाळी है। वे आज राजस्थान विश्वविद्यालय रा 34वां दीक्षांत समारोह मांय बोल रह्या हा। राज्यपाल कह्यो के नैतिक मूल्य देश री संस्कृति री खास बुनियाद रह्या है अर नुवी शिक्षा नीति आं सगळां ने जोड़े है। वे अब्बल विद्यार्थियां ने सोना रा तमगा दे र नवाजा। जळसा मांय विधानसभा अध्यक्ष वासुदेव देवनानी जूना ज्ञान ने नुवी निजर ऊं नुवी शिक्षा नीति रे जरिये प्रसारित करण माथे ज़ोर दीनो। कार्यक्रम मांय उपमुख्यमंत्री अर उच्च शिक्षा मंत्री डॉ. प्रेमचंद बैरवा विकसित भारत बणावण सारू ऊंचा दर्जा री भणार्ई-लिखाई रो मोटो काम बताता थकां ई सारू सगळां ऊं मिल र काम करण बाबत् कह्यो।

000

खाद्य अर नागरिक आपूर्ति मंत्री सुमित गोदारा आज श्रीगंगानगर मांय जिला स्तर रा अहलकारां सागे विकास री योजनावां रो जायजो लीनो। श्री गोदारा बजट मांय करी ज्या ऐलाण ऊं जुड़्या विकास रा काम बेगा सरू करण रा हुकम दीना। ऑपरेशन सिन्दूर रो जिकर करता थकां वे कह्यो के जिला प्रशासन, पुलिस अर न्यारा-न्यारा महकमां कानी ऊं बेहतर तालमेल सागे करी ज्या काम सराहवणा जोगा है। वे अहलकारां ने सिविल डिफेंस अर दूजा खुद सेवकां ने टेम-टेम परां सिखावण देता रहवण सारू कह्यो।

000

खेलो इंडिया यूथ गेम्स आज पूरा व्हे रह्या है। पटना रा पाटलिपुत्र स्पोर्ट्स कॉम्प्लेक्स मांय रंगारंग समारोह राख्यो जा रह्यो है। 4 मई ऊं सरू व्ह्या खेलो इंडिया यूथ गेम्स मांय महाराष्ट्र 158 तमगा जीत र अब्बल जद के हरियाणा 117 तमगां सागे दूजी ठोड़ माथे रह्यो। राजस्थान सोना रा 24, चांदी रा 12 अर कांसा रा 24 तमगां सागे तीजी ठोड़ माथे है।

000

प्रदेश मांय आज गर्मी रो असर ओजू बध ग्यो। लारला 24 घंटां मांय 22 शहरां मांय पारो 40 डिग्री सेल्सियस ने पार कर ग्यो। मौसम महकमा रे मुजब सब ऊं बत्तो 45 डिग्री सेल्सियस तापमान श्रीगंगानगर मांय दर्ज करी ज्यो। ई बीचे विभाग आज अजमेर, जयपुर, कोटा अर उदयपुर संभाग मांय कठे-कठे ज़ोरदार बायरो बाजण सागे हल्की बारिश रा आसार जताया है। मौसम केन्द्र जयपुर रा निदेशक राधेश्याम शर्मा बतायो के राज्य रा आतूणी हलकां मांय आवता दिनां लू बाजण री शंका है, जदके उतराद हलकां मांय कठे-कठे- आंधी चालण री संभावना है।

000

केन्द्रीय संचार ब्यूरो री ओर ऊं आज पाली जिला रा बांकली गांव मांय जागरुकता कार्यक्रम राख्यी ज्यो। ई दौरान केन्द्र अर राज्य सरकार कानी ऊं चलायी जा रही जनता रा भला री योजनावां री जाणकारी दीरीजी। ई सागे ई हमारा संविधान हमारा स्वाभिमान अर साइबर क्राइम से बचाव मुद्दां माथे वार्ता राख्यी ज्यी अर सवाल-जवाब री होड़ व्ही।

000

रिटायर व्ह्या आई.ए.एस. अहलकार अर पैली वाळा रक्षा सचिव अजय कुमार आज संघ लोक सेवा आयोग रा अध्यक्ष रा तौर ऊं शपथ लीनी। वां ने यू.पी.एस.सी. रा आला सदस्य रिटायर्ड ले. जनरल राज शुक्ला शपथ दिरायी। डॉ. कुमार अगस्त 2019 ऊं अक्टूबर 2022 ताई रक्षा सचिव रा ओहदा माथे सेवा दीनी ही। काल राष्ट्रपति द्रौपदी मुर्मू अजय कुमार ने संघ लोक सेवा आयोग रा अध्यक्ष नियुक्त कीना हा।

000

जयपुर ग्रेटर नगर निगम रा सगळा जोन मांय गैर—कानूनी तरीका ऊं लगायी ज्या होर्डिंग, बैनर अर पोस्टर हटावण रो खास अभियान चलायो जा रह्यो है। निगम री आयुक्त रुक्मिणी रियार बतायो के ओ अभियान 31 मई ताई चलायो जावेला।

000

प्रधानमंत्री नरेन्द्र मोदी 25 मई दीतवार ने आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला। आ हर महीना प्रसारित कर्या जावण वाळा ई कार्यक्रम री 121वीं कड़ी व्हेला। ई सारू आप ई 23 मई ताई सुझाव भेज सको हो। आप मुफ्त नम्बर 1800-11-7800 या नरेंद्र मोदी एप या माय जीओवी ओपन फोरम रे जरिए सुझाव भेज सको हो। ओ कार्यक्रम आकाशवाणी अर दूरदर्शन रा पूरा नेटवर्क, आकाशवाणी समाचार री वेबसाइट, न्यूज ऑन एआईआर मोबाइल एप, आकाशवाणी समाचार, दूरदर्शन समाचार, प्रधानमंत्री रा दफ्तर अर सूचना अर प्रसारण मंत्रालय रा यू-ट्यूब चैनलां माथे ई उपलब्ध रेहवेला।

000